

■ TRIBUNA POLITICA

Incumbensa ed independenza da la Banca Naziunala Svizra

DA BARBARA JANOM STEINER,
CUSSEGLIERA GUVERNATIVA

Dapi ils 15 da schaner 2015, q.v.d. dapi l'aboliziun dal curs minimal da l'euro sco er dapi l'introducziun da tschains negativs vegn la Banca Naziunala Svizra (BNS) discutada dapertut. En bleras discussiuns sa mussi ch'i n'è betg cler per tuts tge incumbensa che la BNS ha atgnamain, tgi che fa tge en quest connex e quant impurtanta che l'independenza è.

La BNS fa sco banca centrala independenta la politica monetara da noss pajais. Tenor la constituziun e tenor la lescha sto ella resguardar ils interess generalis da la Svizra. En quest connex ha ella sco finamira prioritara da garantir la stabilitad dals pretschs e da tegnair quint dal svilup conjunctural. Per il svilup da l'economia fixescha ella perquai cundiziuns da basa generalas perquai che la stabilitad dals pretschs è ina premissa essenziala per la creschientscha e per il bainstar. Sia politica monetara realisescha ella dirigend la liquiditad sin il martgà monetar sco er fixond la tschainsida da ses credits da giro ed influenzond uschia il nivel general dals tschains. La Banca Naziunala gida a stabilir il sistem finanziel. Ella adem-



plescha questa incumbensa cun analizar las funtaunas da privel per il sistem finanziel e cun mussar in eventual basegn d'agir.

Il cussegl da banca dad 11 personas ha la surveglianza e la controlla da la gestiun da la BNS. Tranter auter fixescha el ils principis da l'organisaziun da la Banca Naziunala, regla la concepziun da la contabilitad, da la controlla da finanzas e da la planisaziun da las finanzas, deliberescha il preventiv annual, giuditgescha ils principis dal process d'investiziun, giuditgescha il manaschament da ristgas operaziunalas, deliberescha il rapport annual ed il quint annual per mauns dal cussegl federal e da la radunanza generala, prepara la radunanza generala ed exquescha ses conclus.

Il directori da trais persunas è l'organ suprem di-

rectiv ed executiv. El prenda las decisziuns concepziunalas ed operativas da la politica monetara, fixescha la cumposiziun da las reservas monetaras necessarias, inclusiv las parts en aur, decida davart l'investiziun da las activas, ademplescha las competenzas monetaras ed exquescha las incumbensas en connex cun la cooperaziun monetara internaziunala.

En vista a la gronda impurtanza da las decisziuns da la BNS datti – gist er sco consequenza da la decisziun da l'onn passà – adina puspè intervenziuns politicas che mettan en dumonda l'independenza resp. che vulan interpretar tala en ina nova moda e maniera. L'independenza da la BNS è garantida tras la constituziun e sto vegnir mantegnida consequentamain gist er en temps difficils. Sias mesiras po la BNS far valair sin ils martgads da finanzas en moda credibla mo sch'ils participants dal martgà èn persvadids ch'ella na vegnia betg indeblida d'intervenziuns politicas er sch'ella ha da prender mesiras nunpopularas. Intervenziuns politicas pudessan avoir consequenzas gravantas per l'abilitad d'agir da la BNS sco er donnegiar a lunga vista sia reputaziun e la finala la stabilitad da noss sistem finanziel. Perquai sto l'independenza da la BNS vegnir mantegnida.